

Gvangjsih Minzcuz Bau

Cawjguenj: Gvangjsih Bouxcuengh Swcigih Minzcuz Cunghgyau Swvu Veijyenzei

Cawjbanh: Gvangjsih Minzcuz Bause

Geiz neix 8 banj

广西民族报 Aenhauh okbanj: CN45-0036

B.2025

Nd.6 Ng.25

Liggaeuq ietceih nienz ndwenloeg coit Geizsoq: Gungh daih 3674 geiz

Bi 2025 Sawcuengh Vahcuengh Suijbingz Gaujsi Yaek Youq 7 Nyied 13 Hauh Gauj

Bonjbauq siusik(Cau Dwzfeih) Mboengq-neix, gicej cam Swcigih Minzcunghveij rox, bi 2025 Sawcuengh Vahcuengh suijsingz gaujsi yaek youq 7 nyied 13 hauh youq Gvangjsih Minzcuz Dayoz gauj.

Ciuq cam rox, baez gaujsi neix boux bauqgauj mboujguenj sai mbwk, minzcuz, bi' ndwen, haglig, guh hong lawz, dieg lawz, guek lawz daengj, ndaej ciuq gij saedsaeh bouxvunz aeuyungh, swyouz senj bauq aen daengjgaep lawz. Gaujsi neiyunz cujyau

dwg gauj boux gaujseng yungh Sawcuengh Vahcuengh ndaej baenzlawz, baugvat gij giekdaj cihsiz Sawcuengh Vahcuengh, gap sawloih cau coenz, yawjdoeg roxyiuj, fanhoiz caeuq raiz faenzcieng doengh gij neix. Gaujsi baen cogaep, cungaep, gaugaep 3 aen daengjgaep, faensoq mbaw gaujgienj gaujsi muenxfaen 100 faen, gaujsi cingzcik 60 faen dwg diuzsienq biucinj habgek, gak daengjgaep baen gyap, iet 2 aen daengjgaep, 80

faen(baugvat) doxhwnj dwg daengjgyap, 60-79 faen dwg daengjiet.

Baez gaujsi neix bauqmingz dwg gwnz muengx bauqmingz, gaujseng gwnz muengx bauqmingz ndaej youq 6 nyied 20 hauh daengz 7 nyied 5 hauh hwnj Swcigih Minzcunghveij Vangj (<http://mzw.gxzf.gov.cn/>), diemj aen lanzmoeg "Sawcuengh Vahcuengh gaujsi gwnz muengx bauqmingz", ciuq bouhloh bae guh couh ndaej lo.

Feihyiz Yungzhaeuj Ndwenngoenz Daihneix

Mboengqneix, youq Nanzningz Si Vujmingz Gih, ciengz hozdung "ngoenz vwnzva caeuq swyenz yizcanj" ndeu haiciengz hoengghwdhwd, hozdung cawjdaez dwg "yungzhaeuj ndwenngoenz daihneix—feihyiz cingq haux-seng", lwnh feihyiz, baij feihyiz, haw feihyiz sam yiengh saeh laebdaeb guh.

Geij bi neix daeuj, Vujmingz Gih Dangjveij, Cwngfuj aeu baujhoh feihyiz yungzhaeuj daengx buenz "vwnzva ak gih" caeuq saenqhwngh lajmbanj bae, guh bujcaz laebdangj, guhndei daengx aen mingzloeg guekgia, swcigih, Nanzningz Si, cwngzgih seiq gaep, okdaiz aen diuzlaeh baujhoh, laeb ngaenzcienz cienhangh, roengz goek maenhhdwd bae cienzswnj dinfwnghz gaeuqgeq.

Ciuq vunz lwnh, aen gih neix guh aen dajveh gungganq bouxcienzswnj, doenggvaq "bohsae faek lwgsae" caeuq "feihyiz haeuj ndawhag", aeu hawfwen, heiqgoengsae, siuqva Bouxcuengh, conzdungj diyzuz haeuj dangzgoq bae. Seizneix, aen gih neix miz gak gaep feihyiz daihyaujsing mingzloeg 128

hangh, bouxcienzswnj feihyiz daihyaujsing 32 boux, hwnqbaenz dieg son' gyauq cienzswnj feihyiz 32 aen.

Youq ndaw Dieg Baeyouz Gamjgoeng, gyoengq bouxhek ei diuz roen iq menhmenh byaij, cawz ndaej yawj gamj yawj bya, lij ndaej bae sawq gangj Vahcuengh, hag eu fwen. Youq Cwngzsiengh Cin Binhgyangh Segih "Diengzhong Fwngz Siuqva Nabfuk", gyoengq mehdajsiuq cingq fwngz mbaeumbeng dajsiuq. Bouxcuengh diengzhong, bouxcienzswnj feihyiz daihyaujsing dinfwnghz dajsiuq Bouxcuengh Nanzningz Si Luz Lanzcinh riu naeuz: "Raizva ciuhgeq cauhamoq yungh daengz sieng daeh, doxgaiq dajcang, gwnzsiengq lajsienq gai hoengh raixcaix, baenz gaiq 'huqlaex Vujmingz' miz daegsaek." Doenggvaq "diengzhong+hozcozse+nungzhu" aen vunqsik neix, Vujmingz Gih bang laebguh 3 aen diengzhong feihyiz, sou 300 lai boux mehmbwk dawz mbanj caeuq vunz vutgungz bae guhhong, vunz bi bingzyaenz ndaej 3 fanh lai maenz ngaenz.

(Ganh Yenyaz Yungz Li)



Yungzsuij: Eu Fwen Coux "Caetit"

6 nyied 22 hauh, Yungzsuij Myauzcuz Swciyen Aen Hezvei Fwencuengh banh gij yienghsaeh angqhoh hezvei laebdaeb 3 hopbi nem coux "caetit", gyoengq boux gyaez eu fwen doxcomz giz ndeu, eu fwen, yienjheiq, danqhaenh gungcanjdangj, danqhaenh sevei cuji, danqhaenh ndwenngoenz ndei, angqcoux "caetit" ciet laebdangj daeuj daengz. Ndaw doz dwg gyoengq boux gyaez eu fwen hwnj daiz eu fwen.

(Lungz Dauh ingj)

Gvangjsih Comz Langhbaij Mbawheiq Faenzsaw Dangjanq Gak Minzcuz

Mboengqneix, ndaw Nanzningz Si Guekgia Dangjan' gvanj, baij miz buek mbawheiq faenzsaw henjrwd ndeu. Baez langhbaij ciendaeh gojgaeq minzcuz doxbyaij doxyau doxyungh ndaw mbawheiq faenzsaw dangjanq gak minzcuz Gvangjsih youq gizneix haiguh, baez langhbaij neix dwg Gvangjsih Saujsu Minzcuz Gujiz Baujhu Yenzgiu Cunghsinh, Nanzningz Si Minzcunghveij, Nanzningz Si Guekgia Dangjan' gvanj caez banh.

"Genzlungh hajcib bi, geiq Cangh Dingzsin, Cangh Dingzvei geij boux nyaebgou faen reihnaz bya ranzyouq cojcienz doengh gij saeh neix, youq Liujcouh Si Sanhgyangh Duncuz Swciyen dieg Duncuz comzyouq soucomz." Ndaw ding langhbaij, 80 gienh mbawheiq faenzsaw dangjanq seiz Cingdaih daengz Minzgoz roengzsim senj aeu haenx mbeibaij youq ndawde. Moix baez gaicawx ndaw heiqnaz, heiqdieg, cungj dwg guhcingq Gvangjsih

gak minzcuz haifwz haidieg, doxvuenh doxgaiq aeuyungh. Gyoengqde mboujdan dwg gij baengzgawq guh gaicawx, engq dwg gij siengcwngh minzcuz doxsaenq doxgap.

Baez langhbaij neix youq gwnzsiengq caez guh, bouxyawj doenggvaq "Gvangjsih Vwnzva Ciuhgeq Maenhndei Soqcih Okbanj Bingzdaiz", couh ndaej roxnyinh gij yinxdaeuz mbawheiq faenzsaw.

(Van Yizmingz)